

Noticia  
Transparente  
di Gobierno

# ISLA ONLINE

Diahuebs 27 Juni 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952

ARTE DI MURAYA  
SAN NICOLAS



**STABILIDAD  
Y  
PROSPERIDAD**  
2 0 2 4



**Gabinete Wever-Croes**





**Durante un reunion cu Prome Minister**

## **PARLAMENTO HUBENIL A TRECE PUNTONAN DILANTI CU TA IMPORTANTE DESDE PERSPECTIVA DI UN HOBEN**




Diaranson 26 di juni Prome Minister Evelyn Wever-Croes a reuni cu Parlamento Hubenil di Aruba pa asina scucha e plannan cu nan ta trahando riba dj'e.

Pa Gobierno di Aruba ta hopi importante pa scucha e bos di nos hobennan. Parlamento Hubenil ta un stakeholder di Gobierno y semper ta tene cuenta cu e posicion cu nan ta trece dilanti. Na e momento aki nan ta den e proceso importante di scoge parlamento- y ministernan hubenil nobo.

Prome Minister ya a haci e cita pa e siguiente reunion unda e parlamento- y ministernan hubenil nobo lo trece nan vision dilanti y hunto cu e vision di Gobierno lo traha na e bienestar di nos hobennan na Aruba. Parlamento Hubenil ta un fundacion cu ya desde su inicio na 2003 ta haciendo cosnan grandi pa hobennan di Aruba y e ta un plataforma importante unda hobennan por desaroya diferente habilidad.

“E habilidad pa bira un lider den comunidad ta uno valioso pa e futuro di nos hobennan y den esey Parlamento Hubenil tin un papel hopi importante. Mi tin pleno confiansa den e grupo di hoben aki. E compromiso di nos como Gobierno ta pa prepara e pais aki pa nos hobennan tuma over den futuro. Mi ta gradici



Parlamento Hubenil pa e reunion y pa trece puntonan dilanti cu ta importante desde perspectiva di un hoben y mi ta felicita nan pa e bon trabou y desea nan hopi exito cu nan proyectonan”, Prome Minister a expresa. 







## Prome Minister Evelyn Wever-Croes: DESVELO CAYA DEDICA NA HONOR DI DR. JOSE GREGORIO HERNANDEZ



Diahuebs mainta 27 di juni, Prome Minister Evelyn Wever-Croes durante un bunita ceremonia, a presencia e desvelo di borchí di e caya dedica na Dr. Jose Gregorio Hernandez na distrito di Dakota.

E mainta aki a inicia cu palabranan di bonbini di señora Suzie Henricus, Fundador y President di Cas di Oracion Jose Gregorio Hernandez. Despues di e bunita palabranan di señora Henricus a sigui e desvelo di e borchí na honor di Dr. Jose Gregorio Hernandez.

Durante su discurso, Prome Minister a conta un tiki di e proceso pa a yega na e bunita dedicacion aki. Basta tempo pasa el a wordo acerca pa señora Suzie Henricus pa cambia e nomber di e caya. E mandatario a splic'e e tempo ey cu esaki ta un procedura largo y basta complica. Despues di esaki, señora Suzie, hopi determina a bin bek cu basta firma den apoyo pa su idea.

Prome Minister ta sigui bisa cu un cambio di nomber di caya tin hopi retonan administrativo cu e comision concerni mester tene cuenta cu nan. Na e momento ey e propuesta a bin dilanti na señora Suzie pa dedica e caya na honor di Dr. Jose Gregorio Hernandez en bes di cambia e nomber. Esaki ta un gesto sumamente bunita y ta un reconocimiento pa loke e dokter a haci y loke cada un di nos ta reconoce cu el a haci y asina Aruba ta muestra mundo henter e aprecio pa e obranan di Dr. Jose Gregorio Hernandez.

“Mi ta gradici señora Suzie cu a cuminsa cu e proceso aki hopi aña pasa y a muestra su determinacion y no a laga nada strob'e y a muestra pakico un fiel devoto ta e miho persona pa lidera un proyecto asina. Danki pa a keda kere den e proceso”, Prome Minister a menciona. ■■■











**Minister Geoffrey Wever:**

## **OPORTUNIDAD PA FORTIFICA AGRICULTURA COMERCIAL ENTRE ARUBA Y SURINAM**

Diahuebs mainta Minister Geoffrey Wever y delegacion di Aruba a sinta cu Minister di Agricultura, Crea di Bestia y Pisca di Surinam Sr. Parmanand Swedien.

Minister Wever: “Mi a splica con hunto cu Minister Arends di sector primario nos ta estimulando agricultura comercial na Aruba, entre otro dor di a incorpora e Agrifund, dor di organisa Agri Business Academy, dor di ta trahando riba e Agri Innovation Park y dor di ta haciendo estudionan riba e tereno di agricultura comercial investigando cua berdura ta mihor pa nos cultiva y cu ki tecnologia lo haci esaki”.

Topiconan di e combersacion tawata intercambio di personal di Santa Rosa y DEZHI di Aruba cu e departamento di agricultura y economia di Surinam pa un periodo pa asina tin intercambio directo di conocimiento. Tambe a papia di e posibilidad pa studiantenan di EPI y Universidad di Aruba por haci un stage na Surinam pa wak con e agricultornan na Surinam ta opera. Un opcion interesante cu Surinam ta brinda ta tereno pa agricultornan di Aruba cultiva na Surinam pa exporta pa Aruba.

“Un oportunidad intersante ta pa match inversionistanan di Aruba cu ta busca oportunidad di inversion y agricultornan na Surinam cu tin conocimiento di agricultura pero kizas no tin aceso na financiamiento. Nos a palabra cu nos ta bai stimula e matchmaking aki”, según Minister Wever.

“E intercambio tawata sumamente interesante y nos a palabra cu e simannan nos dilanti nos lo bai traha riba un framework pa formalisa e intencionnan. Mi ta hopi enthousiasma pa cu e oportunidadnan aki cu Surinam por ofrece Aruba”, según Minister Geoffrey Wever. ■■■





**Minister Geoffrey Wever:**

## **ERNST & YOUNG CU PRESENTACION TOCANTE "DOING BUSINESS IN SURINAM"**

Diamars merdia Ernst & Young Suriname a duna den presencia di Minister Geoffrey Wever y e delegacion comercial di Aruba, cu ta actualmente na Surinam, un presentacion relaciona cu "doing business in Surinam", con e economia ta, con bo ta haci negoshi na Surinam, con e sistema legal y fiscal di Surinam ta funciona.

Surinam, un pais independiente, tin su propio reglanan fiscal pero tambe custumbernan cu un comerciante mester tene cuenta cu'ne ora di haci negoshi. Un presentacion sigur hopi interesante y Informativo pa tur esnan cu tabata presente.

Na momento cu Minister Wever a anuncia cu ta bai organisa un mision comercial pa Surinam, Sr. Di-Stefano Wernet, un accountant cu ta trahando na Ernst & Young a propone pa Ernst & Young duna sosten na e mision comercial y asina a organisa pa Ernst & Young duna un presentacion di e delegacion comercial di Aruba.

Minister Wever ta gradici Ernst & Young pa e presentacion amplio duna y pa nan cooperacion cu Aruba.




## **DELEGACION DI ARUBA A REUNI CU DOS COMPANIA DI LOGISTICA DI SURINAM**



Minister Geoffrey Wever y e delegacion di Aruba a reuni diaranzon mainta cu dos compania di logistica di Surinam pa discuti transporte y logistica.

Durante e reunionan aki e dos empresanan a splica e delegacion di Aruba con por transporta container di Surinam pa Aruba y tambe con por consolida diferente producto den un container. E delegacion di Aruba a haya un splicacion di e tarifanan di container, e tempo cu ta tarda pa un container jega Aruba y varios otro topico relaciona cu e transporte di producto. Na Surinam tin dos empresa cu por ofrece e servicio aki. E reunion a termina cu un palabracion di con por transporta producto na un forma mas consistente.



"Awor nos ta den contacto cu e dos empresanan aki y nos tin e formula con pa transporta producto di Surinam pa Aruba y nos sa con pa consolida, y con pa percura cu tur siman tin un carga di Surinam pa Aruba. Consistencia ta importante.", segun Minister Geoffrey Wever.



# DELEGACION DI ARUBA A HAYA UN RECORIDO DEN PORT DI SURINAM Y A REUNI CU MINISTER DI TRANSPORTE


Despues di a sinta cu e 2 compania nan di logistica di Surinam diaranson mainta, Minister Geoffrey Wever y e delegacion di Aruba a bishita e port di Surinam y a reuni cu un di e port operators esta VSH Holding. Durante e meeting aki Minister Geoffrey Wever a haya un splicacion amplio di e proceso di load (consolida y no consolida), unload y clear containers na Surinam. Despues di e meeting aki Minister Wever a haci un recorrido den e Port pa haya un bista visual di e proceso y di e Port di Surinam.

E delegacion a reuni tambe cu e Minister di Transporte, Comunicacion y Turisme Sr. Uraiqit Ramsaran cu ta responsabel politicamente pa e Port di Surinam y tambe pa e aerolinea nacional. Durante e reunion aki a papia cu lo juda cu importacion di producto di Surinam si e aerolinea nacional agrega un vuelo di cargo entre Aruba y Surinam of pa e avionnan comercial pone mas espacio pa carga di berdura y fruta fresco pa exportacion pa Aruba.

“Un encueta hopi strategico y awo nos tin contact directo cu tur e stakeholders importante relaciona cu importacion di producto di Surinam y asina nos por duna miho gia y asistencia na nos empresarionan cu kier importa producto di Surinam pa Aruba”, según Minister Geoffrey Wever.







Arte di Muraya na San Nicolas no ta simplemente  
verf riba bloki. E creatividad, fantasia y color riba e  
murayanan ta un fuente di inspiracion di artistanan  
pa encurasha nos pa brasa e poder di creatividad y  
colaboracion na nos barionan di Aruba.

**2024**

AÑA DI STABILIDAD Y PROSPERIDAD